

petierit de lætitijs & ludis, & causis mulierum, perficiet & habebit.

Venus in reuolutione ad locum Solis radice conuersa, si fuerit iuncta cum eo, & ipsa potestatem habuerit, ac testimonium in anno, & ambo fuerint in aliquo angulo, natus patietur grauamina, & labores, occultabit se à rege. Et si ab angulis remoti fuerint, accident ei infirmitates calidæ. Et si Sol ibi testimonium habuerit uice Veneris, crescet in ualore ac laude, habebit dominium, faciet itinera, capiatur amore.

Venus reuerfa in reuolutione ad locum suum in radice, si habuerit posse & dominium in anno, ascendet in precium & ualorem, perueniet ad dominium, & renouabuntur res, quas significauit in radice, crescet in societate, nutritione, uestimentis & opibus.

Si uenerit Venus in reuolutione ad locum Mercurij radice, habens posse ac testimonium in anno, potentiam habebit, ac gloriam in loquendo & ratiocinando, ac doctrina. Et si testimonium fuerit Veneris, associabitur cantoribus, ioculatoribus. Et si ambo infortunati fuerint, uel unus eorum, accident ei grauamina & labores causis & rationibus istis.

Cum accesserit Venus in reuolutione ad locum Lunæ radice, & fuerit Luna ab infortunis salua, & una earum habuerit potestatem, ac dominium in anno, prosperabitur status & negocium eius, & societates suæ, uersabitur cum Regibus, fratres habebit si uixerint eius parentes, alioquin lucrabitur amicum qui sibi erit tanquam frater.

### De reditu Mercurij.



**M**ercurius in reuolutione peruenerit ad locum in quo fuerit Saturnus in radice, & habuerit Mercurius testimonium in anno, fueritq; ab infortunis saluus, natus faciet itinera in quibus crescet eius bonum & status, forte habebit filium illo anno. Et si Saturnus testimonium habuerit uice Mercurij, destruentur eius filij, ipse infirmabitur, eius consilia & cogitationes inuoluentur, damnabitur lex eius, omne factum bonum auersabitur.

Si uenerit Mercurius in reuolutione ad locum Iouis radice, & si unus eorum habuerit testimonium in anno, dignitatem & honorem habebit, natus ab alio se meliori, augebitur doctrina & sensus eius, uxorem ducet, si fuerit ad hoc aptus. Et si testimonium habuerit, & fuerit infortunatus, adducet damnum de genere significationis ipsius infortunij, & inimici aduersabuntur ei.

Si uenerit Mercurius in reuolutione ad locum Martis radice, si ambo habuerint testimonium in anno, natus addet mendacia & fallitates, dicet res quæ nunquam fuerunt, nec acciderunt. Et si retrogradus fuerit unus eorum, faciet furta. Et si testimonium fuerit Mercurij solius, significat damnum in statu eius, & quod accident infirmitates ei ex calore & sanguine. Et si per Martem damnatus fuerit in reuolutione, erit in metu moriendi illo anno. Et si testimonium fuerit Martis eo intrante sub radios Solis, timebit ne interficiatur anno illo, uel expellatur de terra sua.

Si uenerit Mercurius in reuolutione ad locum Solis radice iunctus cum eo, & Mercurius habuerit testimonium in anno, & fuerint ambo in aliquo angulorum in bono statu, habebit honorem & dignitatem regis, maxime si fuerint in medio cæli. Et si fuerint remoti ab angulis hæc significationes, erunt minores. Et si testimonium